



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ

Orthodoxorum Medicorum Patrono.

QUÆSTIO MEDICO-CHIRURGICA, \*

QUOD LIBETARIIS DISPUTATIONIBUS  
manè discutienda, in Scholis Medicorum, die Martis vigesimâ primâ  
mensis Februarii, Anno Domini M. DCC. LVIII.

M. JOANNE-JACOBO MESSENCE,  
Doctore Medico, Præsidente.

*An Caries, in extremitatibus ossium, vix sanabilis?*

I.



RO diversâ ætate, diversa ossium durities. Ossa tenelli  
homuncionis in carcere materno inclusi, vix ceræ mol-  
litiem habent; paulatim & temporis serie, dum crescit  
infans, crescunt & fibræ ossæ, & vires eundo acquirunt;  
ita ut in puero, qui scit voces reddere, & certo pede  
signare humum, jam aliquatenus indurescant: at in ætate proveciore

\* Auctore M. J. OANNE-FRANÇOISEZ, anno 1748.

(a) Fernclii descript. corp. hum. cap. 2.

possunt considerari, (a) *tangam propugnacula adversus omnes impetus, stabilimen atque robur corpori susinendo, haud secus atque basis & columna adibus subiecta*. Ossium substantia triplex, & à variâ figurâ varia sortitur nomina; dura nihil aliud est, quàm coadunatio fibrarum ossæarum, quæ sunt juxtâ se invicem positæ, & quæ immediatè sese tangunt; reticularis conflatur ex iisdem fibris sese in omni sensu decussantibus; & cellularis est eadem substantia in cellulas innumerabiles distincta: hæc reperitur tantùm in ossium extremitatibus, sed harum cellularum parietes ita sunt à naturâ dispositi, ut ad ultimam lamellam, quâ obducuntur ossium extrema, rectâ pertingentes, hujus fiant quasi totidem adminicula. Hoc mirabile artificium structuræ internæ ossium nitidissimè apparet perpendenti os femoris serrâ cum arte defectum.

## II.

(a) Winflow, Traité des Os frais. n°. 2.

**E**XPA NSIONE membranosa, sensu exquisitissimi donatâ, periosæo dictâ, involvuntur ossa. Hæc sustinet rete admirabile vasorum capillarium, quibus mediantibus, sanguis & succus ad ossa nutrienda advehitur: in ossium cavitate reconditur substantia pinguis & oleosa, medullæ nomine donata; (a) est massa quæ componitur ex infinitis vesiculis sive cellulis membranosis, quæ continent materiam oleosam, unctuosam, sapore dulcissimam; & hæc vesiculæ sunt majores circa juncturas: præterea extremitates ossium perforantur pluribus poris medullosum succum in cellulas eructantibus; vasa tum sanguinea, tum nervosa sese comitantia internè penetrant ossa. Ex hac ossium structurâ abundè liquet, quantis obnoxia malis evadant. Si enim tumor ipsis accidit, Exostosis; si vi disrumpuntur, Fractura; si ossa incurvantur, & ipsorum extrema ampliantur, ut in infantibus, Rachitis est; si soliditatem firmitatemque suam deperdunt, Mollities audit: sunt etenim multæ causæ, quæ valent mutare indolem liquidæ ossis permeantis; si non gaudeat tenuitate, mobilitate necessariâ, ut hæcce vascula minimâ lustrare possit, brevi stagnabit, à stagnatione fiet acris, ab acredine destructio fibrarum, & proinde caries, quæ mala, in parte ossis solidiore; in reticulari, pejor; in extremitatibus, pessima.

## III.

(a) Boerh. de morbis Ossium.

**C**ARIES morbus est, quo ossium lamellæ squamatim eroduntur; attendendo ad præcipua cariei phænomena, verani cariei ideam habebis. Os, quod caries aggreditur, sit pingue, colorem suum mutat, ex subcæruleo candido in flavum, huic flavedini succedit nigrities; si specillo tetigeris, asperum, spongiosum, & molle evadit, foveæ profundæ excavantur in suis cellulis, (a) *fatorem singularem*

*rancidi lardi* exhalat, caro superincumbens, fungosa, mollis, flaccida, tumens, & ad levissimum tactum cruorem tetrâ sanie imbutum effundens: si oleum medullosum in suis vesiculis stagnet, brevî fiet flavum, & ab hâc causâ repetenda ossium flavedo, cuncta enim pinguiâ temporis lapsu flavescunt: ast si ille succus oleosus magis evolutus, sulcos & foveas imprimat in parte ossium solidiore, quantam stragem producet in ossium extremitatibus, quæ sunt totæ ferè cellulosæ, magnâ olei quantitate turgent, undè faciliùs serpit vitium.

## IV.

**A**CCUSENT alii qualitatem scorbuticam, alii scrophulosam, alii rachiticam, alii luem veneream, singula propriis & remediis convenientibus debellanda: hîc sufficiat tantùm attendere, medullam à stagnatione corruptionem acquirere; ossis contusio, vitium periostei, & quilibet liquor acer ossis partes tangens, corruptionem, & proindè cariem poterunt producere: inter morbos, qui manum requirant, caries annumeratur. Quando hic affectus substantiam ossium duram aggreditur, lentè, ac testudineo quasi passu progreditur, & hâc de causâ facilè curatur; & ille omne tulit punctum, & celebrem sapiùs sanationem obtinebit, qui inquinatas ossium particulas à sanis separabit; & qui sic ad opus se accingat: os cariosum priùs nudat, dein, ruginæ ope, os ipsum abradit, donec ex nigro album appareat, & pristinum suum colorem recuperet: quoad medicamentâ externa, utendum iis, quæ usu quotidiano confirmantur: sed caries, quæ extremitates ossium inficit, difficillimè potest deteri, ut potè quòd in extremitatibus cellulæ sint, quasi confertim aggregatæ. At, inquires, in hâc specie cariei nonne ignis, ceu ferrum candens debeat applicari, ut remedium efficax, & quod omne cariosum destruit? Hâc se methodo jactitent fautores! Absit, ut tale remedium adhibeas in humanum prorsùs. Quantâ etenim cum cautelâ Chirurgus admoveat ignem, ignis partes sanas offender, undè brevî partium distractio, laceratio; & exindè necessariò sequitur phlogosis, inflammatio, dolores atrocissimi, & convulsiones: præterèa oleum, quod levissimò calore fit rancidum, brevî ignis ope deterius fiet; hinc novus malorum fomes: quin imò febris lenta, delirium, marasmus sunt totidem symptomata ab ignis applicatione metuenda.

## V.

**P**ROGRESSUS cariei in ossium extremitatibus, quem partium structura evidentissimè demonstrat, quotidianâ confirmatur experientiâ. Caries enim brevî destruit extremitates ossium, & portiones

integras apophisum tum tibiæ, tum femoris, tum humeri secum rapit, & hæc vix ullâ arte sanabilis. Frustrâ sapius adhibentur ruginæ, & terebræ perforantes, frustrâ uteris spiritu vini simplici, tincturis myrrhæ, aloës, & aliorum aromaticorum, quæ sæpè arcere valent putredinem, & corruptionem olei & succi medullaris, frustrâ manu habili oleis guaiaci, cariophyllorum, & camphoræ os cariosum inungis, dum sanationem expectas, infelix oleum & operam perdis; recrudescunt citò omnia rancidi olei accidentia, & adest quasi *perlinax rebellio* contrâ optima medicamenta. Observandum est insuper, quòd extremitates ossium articulationibus, ut plurimùm, inserviant: quâ igitur arte sperari poterit sanatio cariei, quæ læso articulo, liquori, quo perpetuò madent ossium extrema, in ipsam ossis exesi substantiam ingressum patefecerit? His tot malis obviam ire cupientes Medici, & ad sanandos morbos viam breviorē seligentes, tutiorem methodum proponunt. Detectâ enim carie, ne teras tempus in applicationibus remediorum, quæ dum inani spe ludunt ægrotantes, artem infamant, & operationem periculosiorem reddunt: sed ad metam propera; ægro remediis convenientibus præparato amputationem, cautionibus adhibitis, quas ars cum successu quotidiano confirmata tibi dicitavit, perface. Ex his liceat concludere:

*Ergo Caries, in extremitatibus ossium, vix sanabilis.*

#### DOMINI DOCTORES DISPUTATURI.

M. Ludovicus-Anna Laperette,  
Censor Regius.

M. Alexander-Dionysus Dienert,  
Bibliotheca Facultatis  
Præfectus designatus.

M. Claudius de la Vigne de  
Frachville, Regi à sanctionibus  
Consiliis, Regina Medicus  
Primarius, necnon Serenissima  
Delphina ordinarius.  
M. Emmanuel-Mauritius du  
Verney.

M. Ludovicus-Petrus-Felix-  
Renatus le Thieullier, Regis  
Consiliarius, & in Majori  
Consilio, necnon in magnâ  
Regia Domus & Francie Præ-  
fecturâ Medicus ordinarius.

M. Carolus Geille de St. Leger,

M. Petrus-Ludovicus-Maria  
Malot, Scholarum Professor  
designatus.

M. Jacobus-Ludovicus Allengu-  
me.

M. Ludovicus-Claudius Bouy-  
delin, Antiquus Facultatis  
Decanus, Regia Scientiarum  
Academia, Regia Societatis  
Berolinensis Socius, & in Hor-  
to Regio Chimia Professor.

Proponebat Parisiis NATALIS-NICOLAUS MAILLET, Carnuteus,  
Doctor Medicus Remensis, necnon Saluberrimæ Facultatis Medicæ Parisiensis  
Baccalaureus. A. R. S. H. 1758, A. SEXTA AD MERIDIEM.